

DONOSTIAKO GAZTEAK

1850 GARREN URTEKO ERREGE BEZPERA GAUEAN.

Marcha, edo ibil berdiña.

Iru errege Orientetik,
Datoz Belengo bidean,
Zeruko izar argi ederra
Lagun dutela aurrean:
Berák emanik argitasuna
Mesias jayo danean,
Berealaše sinistu dute
Biotz osotik fedean.

Errege oek eman digute
Ejemplo ona gaur bertan,
Nola agertu, zer moduz egon,
Jesus onaren oñetan:
Eskatzen beti biotz barrendik
Gogoz ordu guztietan,
Gorde gaitzala bere grazian
Bizi geran egunetan.

Bastorela, edo artzai kanta.

Pozez, kontentuz,
Naikeran, eta
Guztiz umore onean,
Egondu giñan
Eche onetan
Onenzaroko gauean:
Gaur ere berriz
Onera gatoz
Adiskide on legean,
Zelebratzera
Errege eguna
Besperatikan pakean.

Jakin dezaten
Gure esker ona
Beti izan dala egia,
Adi, bezate
Arretarekin,
Zabal bezate begia:
Ikus dezaten
Gure egin naya
Berontzat dala aundia
Soñua, kanta,
Jayotz-lekua
Guztia degu berria.

Zortzikoa.

Echekoai gau onak
 Emanik aurrena,
 Zelebratzera gatoz
 Errege eguna:
 Berak bezela degu
 Izarra laguna,
 Adoratu dezagun
 Gure Jesus ona.

Jai ona bezperatik
 Degu gaur gazteak,
 Batzuek soñuakin
 Kantari besteak:
 Ontarako gurekin
 Datoz Erregeak
 Lendanaz aitortuaz
 Beron bondadeak.

Errege santu oek
 Orientekoak,
 Izan arren lenago
 Mago legekoak:
 Sinistatu dituzte
 Obra on gaurkoak,
 Argiturik beingoan
 Izar zerukoak.

Beren umiltasunak
 Digu erakutsi,
 Gloria zerukoa
 Nola irabazi:
 Gaurdandikan ikasten
 Bear degu asi,
 Eta oitu bezela
 Ez geroko utzi.

Koroa.

Beron agirandoaz
 Onenzaroetan
 Oroituko gerade
 Gure egunetan:
 Orduan etorria
 Ez gaude damutan,
 Ageri dan bezela
 Orañ emen bertan.

JOSÉ VICENTE ECHEGARAY.

